

Fein noch ein andre Schneckenlini macht man aus eynem rechten zirkelriß / die auch die Steynmeß zu den stigen gebrauchen / sie wirdet aber billicher eyn schrauffen lini genant / doch man nen sie wie man will so ist es eyn nütze Lini / darumb wil ich sie hinach auch leren machen / vnd wer suchen mill der mag vil darauß finden / Reiß erstlich eyn runden riß wie vor angezeygt aus eym Centro .a. den theyl mit eynere auffrechten Lini / durch den Centrum .a. in zwey gleiche theyl vnd setz oben da der zirkelriß gerürt wirdet .12. vnd vnden .6. darnach far aus dem puncten .12. mit eynere geraden Lini vbersich / so ferr du der bedarfft / der ende sey oben .a. Darnach schneyd dise auffrechte Lini vnden nahent bey dem grund des zirkelriß mit eynere zwerchlini .c.d. zu gleichen winceln ab / der ende sey .b. Darnach theyl den grundt der zirkellini mit puncten in .12. gleyche theyl / vnd setz ir zall darzu / vnd heb zu nechst bey der seitten .12. an zu zelen .1.2.3.4.5.6.7.8.9.10.11.12. / bis du wider kombst zu zwölffen / aber darnach muß die zall fort lauffen / vnd so weyt du der bedarfft auffeinander gestellt werden / also kumbt zum ersten .13. auff eyns .14. auff 2. 12. Also mag man die zall / drey / vier / fünff mal vnd so offte man will vber eynander zihen vnd füren nach dem man eyn Schnecken hoch machen will / So nun diser grundt zugericht ist / als dann punctir die auffrechte Lini .a.b. so in vill theyll als du wilt / vnd setz die ziffer darzu / vnd heb an bey ende des .b. vbersich zu zelen / 1/2/3/4/5. Darnach far aus dem puncten des grundes .1. aus der zirkellini vbersich durch die zwerchlini .c.d. darnach far aus der auffrechten lini .a.b. von dem puncten .1. mit einer zwerchlini gegen der auffrechten die aus dem grundt des puncten .1. vbersich gezogen ist / Wo dann dise ein eck schliessen da setz auch ein puncten .1. also thue im durch die ganz zall des grundes vnd der auffzogen linien .a.b. durch alle puncten / auch in der vberlauffung der zall als hoch du steygen wilt / So nun die schneckenlini allenthalben also punctirt ist / als dan zeuch die Schneckenlini von der hand dareyn / wie ich dann das hinach hab auffgerissen / Item die schneckenlini mögen auch von punct zu punct ecket gezogen werden / Man mag auch eyn solchen schnecken zwisfach machen in seinem gang / Erstlich mache man die spindel im Schnecken gerad vnd ganz / So mag man sie auch holl machen / oder gewunden / also das man von oben dar durch bis auff den grund siche / wie dann die Steynmeßen das in irem auffreissen sollen wissen zu machen / vnd durch verruckung der grundbretter in das werck zihen / Item aus diser vorgemelten lini mache man schrauffen von eym / zweyen / oder dreyen / oder vier gengen 12. damit man so schwer vnd starck ding mag heben vnd brechen das sich des zuuerwundern ist.

